



L'AN NÒU

Que l'annado 2018, vous tènque flòri de santa, plen de bonur, emé toujours voste parla en bouco.

Prouvènço d'aro

Tóuti li mes, lou journau de la Prouvènço d'aro

Janvié de 2018

n° 339

2,10 €

Federacioun dis Ensignant de Lengo e Culturo d'Oc

1 poste

Au printèms passa, lis ensignaire d'òcitan/ lengo d'oc se regaudissien après d'annado de demando vano, de la creacioun d'un concours d'agregacioun de lengo de Franço - emé chausido òcitan/lengo d'oc, mai de 20 an après la creacioun dóu CAPES. La duberturo de l'agregacioun durbiessié enfin de possibleta d'evolucioun de carriero i centenat de proufessour en poste en licèu e coulège, e òufrissié de perspeitivo is estudiant.

De fourmacion durbiguèron à Toulouso e Mount-Pelié. Un cinquantenat de candidat se marquèron au concours e se meteguèron em' estrambord à la preparacioun d'esprovo eisigènto; lis universitari elabourèron de cours, ourganisèron de simulacioun d'esprovo, de journado de travai mutualisado entre lis dos universita.

La preparacioun dóu concours devenié tambèn un liò de prefeciounamen di sabé dis universitari. Mai li poste vènon de parèisse: 1 soulet pèr l'òcitan/lengo d'oc.

Es-à-dire 1 poste pèr 50 candidat!

Aquelo decisioun tèn dóu mesprés mai brutau e l'acetan pas, quinte que n'en siegue lou pretèste, mai que mai bugetàri: la realita di candidat fai que soun deja ensignaire, afeita sus de poste. S'agis dounc pas de creacioun de ressourço nouvello, mai soucamen de la possibleta d'uno proumoucioun que li boutèsse en egalita emé si coulègo dis àutri disciplino.

Apoundèn à-n-acò que lou nombre de poste au CAPES 2018 es pas que de 4.

Siegue uno baïssio de 33% pèr raport à la sessioun 2017 e que l'espaci d'oc coumto 32 despartamen, qu'uno bono partido an pas cap de proufessour dóu segound degrad titulàri e mesuran l'ample dóu mesprés de cap à-n-uno lengo pamens iscricho dins lou patrimòni nciounau (Art. 75.1 de la Coustitucioun). Dóu tèms de la campagno presidencialo, lou candidat Enmanuel Macron, qu'afourtis que fai toujours ço que dis, explicavo que facilitarié, "dès l'école, l'apprentissage des langues et cultures régionales, dont l'intérêt éducatif, linguistique et culturel est reconnu". Lou quite segne Macron que s'estrambourdavo à Pau lou 12 d'abriéu passa sus aquelo "France plurielle" e "ses belles langues régionales" que, coume disié "je veux reconnaître et que nous reconnaitrons".

Poudèn pas que nous estouna que lou ministèri de l'Educacioun naciounalo chausigue lou camin inverse. O acetan pas. E lou faren saupre publicamen... Enfourman tre aro nòstis elegit, deputat e senatour, representant di couleitiveta territorialo, e mai lis ourganisacioun sendicalo. Demandan à tóuti li ciéutadan d'aqueste país estaca à la pluralita linguistico e culturalo de sousteni nosto demando d'augmentacioun de poste à la sessioun 2018 pèr li concours de l'agregacioun e dóu CAPES. La peticioun en ligno : *Des postes aux concours d'enseignants d'ocitan-langue d'oc.*

Li Sudisto an gagna la PACA



Sabèn pas s'avié legi noste numerò passa de *Prouvènço d'aro* ounte renavian d'agué toujours marca PACA sus la placo d'inmatriculacioun au quiéu de nòsti veituro, mai lou Renaud Muselier, presidènt de la Regioun vèn d'anuncia à l'assemblado pleniero dóu 15 de desèmbre lou cambiamen d'apela-cioun de noste país, valènt-à-dire de sa zono de gouvernanço.

Countènt de sa troubaio, l'a fa saupre tant lèu sus la telaragno di resau souciau, estènt coume cadun lou saup lis Aupen, li Costo-d'Azuren e li Prouvençau, soun tóuti penja dins lou maiun dóu bèu mounde di fielaire de telo aparisenquido, emé lou lengage que counvèn :

C'est officiel, @regionpaca devient la « Région Sud » ! Je ne supportais plus l'acronyme #PACA qui ne veut rien dire. Notre territoire c'est le soleil, la mer, la montagne, le bien-vivre. Il était indispensable de donner à notre région un nom valorisant tous nos atouts : le Sud.

Osco! Li Pacalian s'endevènou li Sudisto, es pas bello la vido dins noste terraire emé lou soulèu, la mar, la mountagno e lou bènvieures la Regioun Sud!

L'esplico es simplò... Que touto barbo d'ome calo, lou presidènt a parla :

"C'est une évidence, tout un chacun pense au Sud quand il pense à notre région et non pas à PACA".

Vòu dire que pèr li Parisen sian au sud, pèr lou mounde fourtuna coume éu que prenou l'avioun, belèu, mai pèr lou pople de Paris que tirasso pèr carriero, sian toujours li Miejourna, noste país es pas lou "Sud" mai lou "Midi" e li Prouvençau soun tóuti de Marsihés emé soun acènt riserèu...

Acò es de parpello d'agasso, Moussu Muselier afourtis soulamen que lou mot PACA "ne veut rien dire", valènt-à-dire qu'es dificile de coumprendre pèr li touristo fourrestié.

Ato, segur, franc emé li Brezilian o li

Camerounen qu'an, éli tambèn, un terradou dóu meme noum "Regioun Sud" sara facile de coumprene la recerco istourico qu'a demanda à nòstis elegit pèr trouba uno apelacioun pariero... an coupia... Basto! Aurié pouscu èstre la Patagounio de la Franço, un terraire bèn au Sud.

Noun, li figo soun pelado, sian aro li Sudisto... Alor sai-que! la guerro de secessioun vai pas coumença...

l'aurié pamens dequé!

Vai! avèn pas perdu l'estello.

Ço qu'aurian espera d'un presidènt tant estaca à sa Regioun Sud es de demanda au Gouvèr parisen, la cououficialeta de la lengo prouvençalo emé la lengo franceso, coume lou reclamou lis elegit de Corso.

Mai, éu, a pas perdu lou Nord... soun Sud es uno regioun franchimando bèn riblado à l'article 2 d'uno Coustitucioun centralisarello.

B. G.

Lengo regionalo Pas de priourita...

Es la ranganello de tóuti li governamen que prenou plaço...

Pajo 2

Lou pouèto Fernand Moutet

Soun pouèmo sus la questioun tihouso qu'asseparo Mirèio de l'Angloro...

Pajo 12

Peticioun pèr "Prouvènço"

De milierat de Prouvençau an adeja signa aquelo renadisso contro lou Sud Paca...

Pajo 3